

## Službeni glasnik BiH, broj 7/14

Na osnovu čl. 33c. i 43b., a u vezi sa odredbama čl. 33a. i 33b. Zakona o državljanstvu Bosne i Hercegovine ("Službeni glasnik BiH", br. 4/97, 13/99, 41/02, 6/03, 14/03, 82/05, 43/09, 76/09 i 87/13), ministar civilnih poslova Bosne i Hercegovine donosi

# PRAVILNIK O VOĐENJU EVIDENCIJA O STICANJU I PRESTANKU DRŽAVLJANSTVA BOSNE I HERCEGOVINE

## Član 1. (Predmet Pravilnika)

Pravilnikom o vođenju evidencija o sticanju i prestanku državljanstva Bosne i Hercegovine (u daljem tekstu: Pravilnik), propisuje se sadržaj i način vođenja evidencija o sticanju i prestanku državljanstva Bosne i Hercegovine iz čl. 33a. i 33b. Zakona o državljanstvu Bosne i Hercegovine (u daljem tekstu: Zakon).

## Član 2. (Evidencija sticanja državljanstva BiH)

Ministarstvo civilnih poslova Bosne i Hercegovine (u daljem tekstu: Ministarstvo) vodi evidenciju o sticanju državljanstva BiH:

- a) lica koja su stekla državljanstvo BiH na osnovu međunarodnog ugovora;
- b) lica koja su stekla državljanstvo BiH naturalizacijom između 06. aprila 1992. i 01. januara 2006. godine (lica za koja se vrši revizija);
- c) lica od naročite koristi za BiH iz člana 13. Zakona.

## Član 3. (Evidencija prestanka državljanstva BiH)

Ministarstvo vodi evidenciju o prestanku državljanstva BiH:

- a) lica kojima je državljanstvo BiH prestalo odricanjem;
- b) lica kojima je državljanstvo BiH prestalo oduzimanjem (u postupku revizije i na osnovu člana 23. Zakona).

## Član 4. (Evidencija o predmetima saglasnosti)

Ministarstvo vodi evidenciju o predmetima davanja svoje saglasnosti na rješenja nadležnih entitetskih organa o naturalizaciji stranih državljana u Bosni i Hercegovini, sa naznakom broja i datuma akta - saglasnosti Ministarstva na eventualno izdate garancije o prijemu u državljanstvo Bosne i Hercegovine, odnosno broj i datum rješenja o oslobađanju od pribavljanja garancije.

**Član 5.**  
**(Evidencija o predmetima naknadnog upisa u MKR)**

Ministarstvo vodi evidenciju o predmetima naknadnog upisa u matične knjige rođenih lica koja su stekla državljanstvo RBiH u skladu sa Zakonom o državljanstvu RBiH.

**Član 6.**  
**(Način vođenja evidencija)**

Evidencije iz čl. 2., 3., 4. i 5. vode se u elektronskom obliku i sadrže relevantne podatke u smislu propisanih standarda (eurostat).

**Član 7.**  
**(Sadržaj evidencije o sticanju državljanstva)**

Evidencija sticanja državljanstva BiH iz člana 2. sadrži sljedeće podatke: prezime i ime, JMB ako je određen, predašnje prezime i ime, spol, datum, mjesto i država rođenja, prezime i ime roditelja, prebivalište/boravište ako ga lice ima, dosadašnje (strano) državljanstvo, datum i broj rješenja o prijemu u državljanstvo BiH, naziv organa koji ga je donio, pravni osnov donošenja, datum sticanja državljanstva (datum dostave rješenja, datum donošenja odluke), broj i datum protokola predmeta Ministarstva i eventualne primjedbe.

**Član 8.**  
**(Sadržaj evidencije o prestanku državljanstva)**

Evidencija prestanka državljanstva BiH iz člana 3. sadrži sljedeće podatke: prezime i ime, JMB ako je određen, predašnje prezime i ime, spol, datum, mjesto i država rođenja, prezime i ime roditelja, prebivalište/boravište, datum i broj rješenja o prestanku državljanstva BiH, pravni osnov donošenja, datum prestanka državljanstva (datum dostave rješenja, datum objave rješenja u "Službenom glasniku BiH"), iznos naplaćene takse ili naznaka "oslobođen/a", novo državljanstvo, broj i datum protokolisanja predmeta (zahtjev za odricanje i određivanje broja protokola u predmetima revizije) i eventualne primjedbe.

**Član 9.**  
**(Sadržaj evidencije o saglasnosti na predmete naturalizacije)**

Evidencija o predmetima saglasnosti iz člana 4. sadrži sljedeće podatke: prezime i ime, spol, datum, mjesto i država rođenja, dosadašnje (strano) državljanstvo, prezime i ime roditelja, broj i datum akta o davanju saglasnosti Ministarstva na rješenje o naturalizaciji, broj i datum rješenja o prijemu u državljanstvo BiH sa nazivom organa koji ga je donio, broj i datum akta o davanju saglasnosti Ministarstva na garanciju, odnosno broj i datum rješenja o oslobađanju od pribavljanja garancije ili o odbijanju zahtjeva za oslobađanje od pribavljanja garancije, broj i datum protokola Ministarstva i eventualne primjedbe.

**Član 10.**  
**(Sadržaj evidencije o naknadnom upisu u MKR)**

Evidencija o predmetima naknadnog upisa u MKR iz člana 5. sadrži sljedeće podatke: prezime i ime, JMB ako je određen, spol, datum, mjesto i država rođenja, dosadašnje (strano) državljanstvo ako ga ima, broj i datum rješenja o naknadnom upisu sa nazivom organa koji ga je donio, broj i datum akta o davanju saglasnosti za predmete gdje je Ministarstvo dalo saglasnost na naknadni upis, a broj i datum protokola Ministarstva za predmete gdje je kontrolisana zakonitost naknadnog

upisa bez davanja saglasnosti na isti (nakon donošenja Uputstva o izmjenama i dopunama Uputstva o naknadnom upisu u matičnu knjigu rođenih koji su stekli državljanstvo R BiH u skladu sa Zakonom o državljanstvu Republike Bosne i Hercegovine ("Službeni glasnik BiH", broj 57/09) i eventualne primjedbe.

**Član 11.**  
**(Stupanje na snagu i objavljivanje Pravilnika)**

Ovaj pravilnik stupa na snagu prvog narednog dana od dana objavljivanja u "Službenom glasniku BiH".

Broj			06-1-30-2-4773/13
22.	januara	2014.	godine
Sarajevo			

Ministar  
Mr. **Sredoje Nović**, s. r.